

Nzryr-krbz Pol Mz Lr Galesia Provins Natq Ngr Nzaplxtqngr Mz Nzryr-krbz Pol Mz Lr Galesia

Aposol Pol yrbzle letz lc mz kxnzrlxngiting kcng tzmncng mz provins kc Galesia, kc tqngi kandre kc Trki mzli ka. Yrle mz mzlr yiz 48—58 AD mz nibr nzrmcngr mz Jiszs.

Pol xlrle kx kzdung lr Jiu kxnzrlxngiting nzalvztr-rbr-ngdr da mz kxtrngiulrJiu kxnzrlxngiting mrkc. Nzrpilr kx kxtrngiulrJiu napakrng x navz-nqblqlr Lou sc Mosis, murde na-arlapxng. Nzrpi-kzlr kx Pol trngini-angidrleu aposol, x kx tekqtrle Nrpakxmrlz mz nzrkatz-krde kzdung lou kx navz-nqblqlr.

Pol yrle letz lc mz nzaelwapx-krde kx nide aposol angidr, x aposol kztedeng drtwrdr esz'ti badr mz nzalvztr-krdeng mz lrpzki r nzrlapxng. Pi-kzpzle badr kx nzvz-nqblq-krdr Lou sc Mosis trkrlzleu nzarlapx-krde nidr, a' nabrti drtwrdr Kraes. Murde mz nzrlr-lzbq-krbzku mz nzvz-nqblq-krgru Mqngrkxtr, trmnczpepwzkuu mz Lou, a' vz-nqblqpeku da kx pim Mqngrkxtr mz nabzgu.

Ngaldeng kxmyapxbz 2:20-21 x dckrlzde kc 5.

Mrkcng Mz Letz Lc

Nike tqyrngr Pol letz lc. [1:1-10]

Nrpakxmrlz kc tqyapwxtipx Pol ngi da angidr murde vzpxm mz Kraes. [1:11-24]

Aposol kc-kzng drtwrdr esz'ti badr Pol mz nzalvztr-krdeng. [2:1-10]

Bzkq atrkatiamu Nrpakxmrlz mz nzrpi-krmu kx namnclzbzku mz lou murde narlapxku. [2:11-21]

Twzku nzlungr angidr mz nzabrtr-krbzku drtwrgu mz Kraes, trngiu mz Lou Sc Mosis. [3:1-14]

Lou sc Mosis trayrkrpxleu da kc tqesalz-kaingr Gct. [3:15-22]

Kxnzrlxngiting nzapulr doa kxtopwz neng Gct, mz nzaxvctr-krbzlr mz Mrlxde, a' nzmncz-ngrbz mz lou apule nznginingr kxnzawz-nrbalqng. [3:23—4:31]

Bzkq mnclzbzmu mz leplz kcng tzsuti drtwrdr nzmncz-krbzmu mz lou mz nzrlapxngr. [5:1-12]

Navz-nqblqku nzymne-krm Mqngrkxtr mz nabzgu. [5:13-26]

Mz nzvz-nqblq-krqu Mqngrkxtr nawztrpzku mz leplz. [6:1-18]

¹⁻² Ninge Pol, ryrbo bamu, nimu kcng tznginidr leplz neng Gct, tzmncng Galesia Provins. Nigr badr mzlegung kcng tzmncng mrka, rpibzkr bamu kx, "Nimu la." Ninge aposol murde Jiszs Kxnzmcpx nidr mz Gct Trte kc tqatulzmlle nide mz nzbzng, nzmcpplr ninge. Delc zmatq rnge mz nzaclve-krnge lrmakxtr trvzpxpuu mz leplz.

³ Krka'-ngrne kx Gct Trtegu x Kxetu rgu Jiszs Kxnzmcpx naokatrlr nimu mz zmrlz ngrdr kxmyalz, murde namnc-zpwxamu badr.

⁴ Nzmnc-zpwxngr lc vzpxm mz Kraes, murde sc tqvz-nqblqpele me pnz drtwr Gct Trte, mz

nzrlrpx-lzbq-krde mz nzbzng. Alele da lc murde rpile nakapxle alwx rgung, x na-arlapxle nigu mz nzrvz-nqblqng nqm q kr kxdrka'-ngrng kcng tzvz-rbrng mz da kx nzaoti drtwrdr x mz da kx nzaleting.

⁵ Delc takitrde nzglqpx-krgru x nzamatq-krgru Gct Trte, tqvzpe tqvzpe. Eu. Angida!

Gct Arlapxle Lepz Mz Hxl Mz Lrpzki Esz'txu

⁶ Kctitxpxx kx esablqti-anipeamu Gct kc tqaveatile nimu mz nzmncz-zvz-krbzmu mz zmrlz ngr Kraes kc tqmyalz. A' sc tqvz-nqblqamu nzalvztrng kzble mz lrpzki r nzrlapxng.

⁷ Kxmule-esz' trpnz-moungr lrpzki r nzrlapxng, a' kzdung leplz sa tzesabrtlr nimu, mz nztekqtr-krdr Nrpakxmrlz angidr kx Kraes esz'-krde arlapxle nigu.

⁸⁻⁹ Pibzkr bamu da lc mzli kc tqmnc-ngrgu. ✧ X mzli ka sa tqpipe-mopwc' bamu. Takitrde Gct nzadwatr-krde doa mz Hxl, kxmule-esz' kzdq nigr aposol o kzdq enjrl kxvzom Heven nzm kx tqalvztr-ngrde lrpzki r nzrlapxng kx blepxbz mz da kc tqyapwxtipebzk bamu, tqlxngitipeamu mzli kc.

¹⁰ Tryrpou bamu da lc murde suti drtwrnge nzabrtzlvz-krmu ninge, da kc tqwai nzpi-krdr ninge. Murde nzm leplz nzabrtzlvz-zvzlr ninge mz nike pibo badr, trtakitrdeu nzngini-krnge kxnzawz ne Kraes. A' da kx myapxbz kx Gct nabrtzlvzle ninge.

Nrpakxmrlz Kc Tqyapwxtipx Pol Ngı Da Angidr Murde Vzpxm Mz Kraes

✧ **1:8-9** Aposol 13:2; 13:13—14:20

11 Mzlangeng x inwengeng, Nrpakxmrlz kc tqyapwxtipxbo trvzpxpuu mz leplz.

12 X trxltr-kzpcw'u mz leplz. A' Jiszs Kxnm-cpx nide esz'-krde kx rpim bange, mz nzadcpz-lzbq-krmlle bange.

13 Krlzpeamu nqmq krnge mzli kc. Murde vz-nqblq-angidrx lou x nqmq krgr amrlx. X lolvz-kzx leplz neng Kraes, mz nzadwatr-krngeleng mz presin, murde ma tzlxngitilr nide.

14 X myaszpxx nrpr kztengeng mz nzpqlz-krmlle mz nabznge nzalvztrkr melrmqgrng.

15-16 A' trkrlzwxu kx mcpz pnz Gct ninge mzli kc mzke' trnzmcka-ngrde, mz nzngini-krnge aposol nede murde napipxbo Nrpa ngr Jiszs mz krkcng trngiulrJiu. A' mcpzle ninge mz nzvz-nqblq-krde zmrlz ngrde kxmyalz, kxmule-esz' trtakitrcw'u nzwzngl lc. Zbz kx krlzpebzle mzli kc tqmcpz pnz Gct, sc tqvz-ngrbo Damaskzs. X sc tqaelwapxpe-ngrmlle bange kx Jiszs Kxnmcpz ngi mrlxde. A' trpnzngl ncblo kx vz-nebax kx nalvztrle ninge mz nzrkrlzngl Kraes. ✧

17 X trvz-kzwxu Jerusalem murde krkcng tznigini-kaiplr aposol bange na-alvztrlr ninge. A' mz nibr nzrkqlengl ninge, vzx mz Arabia provins. X mz nibr kzdung mzli, sc tqyzlupe-moux mz taon kc Damaskzs.

18 Zbz yiz tq kaputpx, mz nibr nzrlxngiti-krnge, sc tqvzpx Jerusalem, mz nzryapwx-krgr mz Pita. Mnctikr bade zbq nzpnu-nrade-nzlvqn.

19 Mzli lcde, oklati-kzx aposol Jemes, mzle Kxetu rgu, kc tqaclvele dzbe lrmakxtr kc mrkc. A' tr-rmctiwxu kzdq kz aposol.

✧ 1:15-16 Aposol 9:1-31

²⁰ Esalzx mz mz Gct, kx da amrlx kx yrbo bamu da angidr.

²¹ Mz nibrde, sc tqyapwxtipxx Nrpakxmrlz mz provins kcng Siriz x Silisia, mrlcdeng trnzklungru lr Jiu.

²² A' leplz neng Kraes kx nzmncng Judiz Provins, trnzkrzkalr ninge, murde tr-rmctilzbqkadr badr.

²³ A' nzxlr-ngrdr nrpa, kx ncblo kc tqatrkatile kxnzrlxngiting mzli kc, mzli ka sa tqryapwpxpe kz Nrpa ngr Jiszs.

²⁴ X nzglqpxlr Gct kc tqtekqtrle ninge.

2

Kxnzaclvelr Dzbe Lrmakxtr Kcng Jerusalem Drtwrdr Esz'ti Kx Nzalvztrkr Pol Tubq

¹ Yiz nzpnu-esz'-nrade-pwx (14) vztx, mz nibr nzoklatingr ayrnrngr lc, vz-moux Jerusalem. X mzli lc vzkr badr Banabas x Taetus.

² Vz-ngrgr Jerusalem murde opx angidr nzrpikrm Gct bange navzx. X kx kaputrpebo kc, yrlwrlxblkrng badr aposol kc-kzng, x kxnzaclvelr dzbe lrmakxtr kc-kzng Jerusalem. X yokaetipx-angidrbo badr Nrpakxmrlz kc tqyapwxtipxbo mz kxtrngiulrjiu. Murde sutitx drtwrnga kx drtwrgr naesz'ti badr mz nzalvztr-krngeng. X murde ma tzatrkatilr leplz nzwz-krnge kalr, mz nzpi-krdr kx drtwr kxnzaclve kcng Jerusalem tresz'tiu mz nzalvztr-krngeng.

³⁻⁶ Murde kzdung ncblo kcng tzrpilr kx nzlxngitilr Jiszs, a' nzpokia-ngrdr da lc, nzalvztr-rbrngrdr kx ncblo napakrng mz nzwz-nqblq-krde

Lou sc Mosis, murde narlapxng. Ncblo lcng nzkrlzlr kx drtqgr opx mz Mevalu Jisz. A' suti drtwrdr kx namncz-mopwzku mz Lou sc Mosis. X nzaprtr-lzbqbnz mz kxnzrlxngiting, murde natekqtrlr nzalvztrngr angidr. A' plzpxkr Nrpa angidr ngr Kraes, murde ma tzatrkatilrle. Tu-amqngikr mz nzalvztr-krgr lcng, murde nakrlzamu lrpzki angidr ngr nzrlapxngr, x narmu ma tqngqngutrpz mz nzalvztr-rbrngr. Aelwangerbzkz mz ncblo kcng amrlx tzaclvelr leplz neng Kraes, kx nzalvztr-krgr ngi da angidr. X kxmule-esz' mz drtwr leplz kxnzkqlung, kxnzacle lcng nzmyaszpxlr ninge, a' trkxu mz drtqng nke aotingr drtwr leplz nidr. Murde Gct trkx-kzu mz drtqde nke aotingr drtwr leplz nidr. A' da kx myapx-zlwzbz kx nzalvztr-krdr ngi da angidr o trtingr. Aelwangerbzkz badr kx nzalvztr-krgrng ngi da angidr, x nzaolvzlr nzalvztrngr lcng amrlx, x trpnzngr da kx natekqtrx elr. Murde kxmule-esz' Taetus tqngi lr Grik x trngiulrJiu, a' kxnzacle kcng Jerusalem, trnzrtultr-ngrdru nzrpakrngr nide mz nzaxvctrkrbzle mz Kraes, murde narlapx.

⁷⁻⁹ Krlzamu kx leplz ne Kraes kcng Jerusalem, nzrpilr kx Jemes, Pita x Jon nzaclvelr nidr. X mzli kc ncblo lcng nztqng tzxlr-ngrdr nzwzkrnge, nzmclr kx Gct aelwapx-ngrde zmrlz ngrde x nzxplr-krde mz nzryapwpxp-krbo mz leplz kxtrngiulrJiu. X nzkrlzlr kx krlc nqm qcpwz tqaelwapx-ngrde mz nzryapwpxp-krbz Pita mz lr Jiu. Mz nzmukrde lcde, opx-angidrbz badr kx Gct mcpxle ninge mz nzyapwxtipx-krbo Nrpakxmrlz mz leplz kcng trngiulrJiu, da kc tqwai

mz nzmcp_x-krbzle Pita nzryapw_xp_x-krbzle Nr-pakxmrlz mz lr Jiu. Zbz aposol lcng nztqng malekr m_qgr badr x Banabas, nangi rkx kx nigr kzte-lzbqgr mz nzwzkr Kraes. X drtwrgr esz'ti kx nigr n_cdr Banabas nawzkr mz mzlr krkcng trngiulrJiu, x nawztrpzng mz lr Jiu.

¹⁰ Da kx nzrlxtitxplr bagr kx na-alekr, nzrkangr trau murde naxpengr dakxnzng nangingan leplz ne Kraes kx trnzr_{ng}iscung, da kc tqwai n_zp_zkr drtwr_{ng}e le mzli kc.

Pol Rpwa'-ngrbzle Mz Pita Nqm_q Krde Kx Trtubqu

¹¹⁻¹³ Nzalvztrngr lc, kx navz-nqblqku Lou sc Mosis mz nzrlapxng_r, vzdz-kaip mzli kx Pita oklati-ngrde leplz neng Kraes mz taon Adiok. Murde mzli kx vz-ayrnr-ngrde mrkc, prtrpz mz leplz neng Kraes kxtrngiulrJiu, x nzmung badr, kxmule-esz' mz nzvz-nqblq-krde Lou sc Mosis batrpzle trnztakitr-krdeu nide mz nzprtrngr mz nzangiongr. A' mz nibrde, kzdung lr Jiu nzrlaszmlr Jemes mrkc Jerusalem, x kzdung nidr nzprtrng mz dzbede kc tzrtulrtr-ngrdr n_zr-pakr_{ng}r. Zbz Pita vecp_x-lzbq_z mz krkcng trngiulrJiu, murde mwxlrtile n_zr-pikitikr dzbede lc. Zbz lr Jiu kxnzrlxngiting kcng amrlx tzmncng Adiok nzvz-nqblq-kzlr nqm_q kr Pita, x tzvecp_x-lzbq_{pe}-kzng mz krkcng trngiulrJiu. Mz n_zmu-krde lc, Banabas nzaprctipe-kzlr nzvz-nqblq_{ng}r nidr mz nzngini-krdr leplz kx trnzvz-nqblq-

angidrlru da kxtubq. *

¹⁴ Zbz nyzymne-krnge xplrtxbz mz Pita, mz mz lr Jiu kc-kzng. Murde opx angidr kx nqm q krde vz-rbr, x trvz-nqblqpeleu Nrpa angidr ngr nzrlapxng. Rpibo bade kx, "Kxmule-esz' nim kzdq lr Jiu, a' trvz-nqblqpewq da amrlx kc tqyclzm mz Lou sc Mosis. ?E memule tqrtulrtr-ngrbzme lrmakxtr lcng trngiulrJiu nzvz-nqblq-krdr Lou kcng?

¹⁵ Blepxbzku mz ncblo ngr alwx kcng trnzkr-lzru Loukxtr. Murde mzku nzmc nzngini-krgr lr Jiu, x krlztipeku Lou sc Gct mzli boipe.

¹⁶ Kxmule-esz', a' krlz-kzku kx leplz trnz-tubqung mz nzobqkr Gct mz nzvz-nqblqngr Loukxtr lc, a' mz nzrlxngitingr Mevalu Jiszs. Dekc, nigu lr Jiu tqlxngitipe-kzku Mevalu Jiszs, x drtwrgu br kx atubqtipele nigu mz nzobqkr Gct. A' trvz-nqblqpekuu Lou sc Mosis mz nztubq-ngrbz mz nzobq-krde. Trpengr kx narlapx mz nzrvz-nqblqngr Lou lc, murde tratubqleu leplz mz nzobqkr Gct. A' aelwatx-ngrpwzle kx vz-rbrku.

¹⁷ A' kzdung lr Jiu kx suti drtwrdr navz-nqblqku Loukxtr, nzrpilr na-atrkatilr nigu. Mwx narpilr kx nigu kcng tzabrtrpwzlr drtwrdr mz Kraes mz nzatubq-krbzle nigu mz nzobqkr Gct, sa tqalebeku alwx. X opxm kx Kraes mailzle nigu mz da kx vz-rbr. A' trtingr!

¹⁸ Murde lxngitipex Kraes mz nztubq-krnge. X nzmu narpix na-atubq-lzbqbo mz nzobqkr Gct

* **2:11-13** Dzbede kc tzpakrng nzlxngitilr Jiszs nide Kxnmcp. A' mz drtwrdr, lrmakxtr amrlx napakr-kzng, x navz-nqblq-kzlr Lou sc Mosis, murde narlapxng.

mz nzrvz-nqblqngr Lou sc Mosis, vz-nqblq-moux lrpzki kc pnz tqpxtxpxpe-ngrne. X mz nzalekrnge da lc vz-rbr-angidrx.

¹⁹⁻²⁰ Murde mz nzaxvctr-lzbq-krbo mz Kraes, axvctr-lzbq-kzx mz nzbz-krde mz kros. X trm-nclzpepwc'u mz Lou, murde trpnzngr da kx na-aletprz Lou kc mz krkcng tzbzpeng. Trvz-nqblqpewxu Lou sc Gct mz nzrlapxngr. X trvz-nqblqpewxu nqm q ngr alwx. A' vz-nqblqx Kraes kc tqilupxm bange, tqkamle bange nzlungr kxrna. X mz nzlungr kxrna lc, sc tqvz zvz nzabrtr-krbo drtwrnge mz Mrlx Gct, kc tqaodule ninge x tqbz-ngrde nzarlax-krde ninge.

²¹ Lolvz-amqngix mz nivz lr Gct x zmrlz ngrde kxmyalz mz nike alepem Kraes bange. Murde nzm nyzlu-mopwc mz nzalvztr-krnge kx navz-nqblqku Lou sc Mosis mz nzrlapxngr, drtwr ngrde kx nzbzkr Kraes ngi brmrda."

3

Twzku Nzlungr Angidr Mz Nzabrtr-krbzku Drtwrgu Mz Kraes, Trngiu Mz Lou Sc Mosis

¹ Nimu lr Galesia, lukurnr-ngrnamu! X opxm kx kzdq ncblo rwitipele nimu leu. ? Nike tqlxngiti-ngrnamu nzpokianger lc? Murde alvztr-zpwxkr nimu mz nzrtqlvztrngr Jiszs Kxnzmcpx mz kros x nzbz-krde mz nzarlax-krde nigu.

² Nadctipx drtwrmu kx Gct kabzle Mqngrkxtr bamu mz nzlxngiti-krmu Nrpa ngr Kraes kc tqyapwxtipxkr. A' trtwztx-pnzwamuu mz nzvz-nqblq-krmu Lou sc Mosis!

³ ?A' nike tqngqngutx-zlwz-ngrnamu mz nzl-xngitingr lc tqpokiangr? Murde abzoamu nzlu-krmu kxmrna mzli kc tqtwz-ngrnamu Mqn-grkxtr tqokatrle nimu. ?A' mzli ka, rpiamu navz-nqblqamu Gct mz nzxplr-krmu esz'-krmu? Nakrlzamu kx nzm trngida-pnz!

⁴ Tu-amqngiamu mz nzrlxngiti-krmu mzli kc, kxmule-esz' nzaetqbz drtqmu. A' mzli ka, opxm kx da kxmrlzting kx navzpxmqng mz nztu-amqngi-krmu lc sa nayrkrpxbz mz nzlxngiti-rbr-krmu lc.

⁵ Mzli kc tqmnc-nrgu, Gct kabzle Mqngrkxtr bamu, x alele da kxmatqng mz mzlirmu. ? Memule, alele da lcng murde vz-nqblqamu Lou sc Mosis o murde lxngitiamu Nrpakxmrlz?

⁶ Na-adcp-mopwc' bamu Nzryrngrkxtr kc tqrpile kx, *“Ebraam tubqbz mz nzobqkr Gct murde brti drtwrde nide.”* ✧

⁷ Nayrplatitr narmu kx krkcng tzrlxngiting da kx esalz-ngrbz Gct, da kc tqwai Ebraam, nidr txpwz leplz neng Gct.

⁸ Mz Nzryrngrkxtr, Gct aopx-pnzle kx sa natubqtile kxtrngiulrJiu amrlx mz nrlc mz doa kx vzpxm mz nqvi lr Ebraam, krlc Kraes. Murde rpibz Gct mz Ebraam kx, *“Mz nqvi lrm, sa namrlzx neidu amrlx mz nrlc ka.”* ✧

⁹ Mz nzm-krde lc, leplz amrlx kcng tzrlxngiting da kx esalz-ngrbz Gct, da kc tqwai Ebraam, sa nartwzng da kcng tqmrlzting tqesalz-ngrbz Gct bade.

¹⁰ X Nzryrngrkxtr alvztr-kz-ngrde kx leplz amrlx kcng tztuong mz nzvz-nqblqngr Lou sc Mosis,

nzmncclzbzng mz nzayrplapxkr Gct, x sa navzng mz Hxl. Murde rpile kx, *“Gct sa na-ayrplapxle doa kx trangidaleu da amrlx kx yc mz Lou scde.”* ☆

11 Trpnzngr kx rkrly nzatubqti-lzbqngr mz nzobqkr Gct mz nzrvz-nqblqngr Louxtr. Murde Nzryrngrkxtr rpi-kzle kx, *“Nzlukr kxnztubqng tutr mz nzbrtikr drtwrdr Gct.”* ☆ *

12 Doa kx vz-nqblqle Lou sc Gct, pxtxpx-ngrde nzesalz-krde. Murde Nzryrngrkxtr alvztr-kz-ngrde kx, *“Doa kx twzle Lou keng, navz-nqblq-angidrle natqdeng amrlx, x bzkq tao pnz mz alwx.”* ☆

13 A' nigu amrlx taoku mz alwx x mnclzbzku mz nzayrplapxngr kc tqvzpxm mz Lou sc Gct. Mz nzmu-krde lc, Kraes arlapxle nigu mz nzayrplapxngr lc. Murde mzli kc tqbz-ngrmle mz kros, tekqtrle nigu mz nzayrplapxngr. Krlzku kx Gct ayrplapx-zpwxle nide, murde Nzryrngrkxtr rpile kx, *“Mrly kx nzado mz nounc, bz-ngrde nzayrplapxkr Gct.”* ☆

14 Mevalu Jiszs arlapxle nigu, murde nzlungr kxboi Heven kc tqkabz Gct mz Ebraam, naka-kzpzle mz leplz amrlx keng tzlxngitilr Jiszs, kxmule-esz' nidr lr Jiu o trngiulrJiu. Bz-ngrde

☆ **3:10** Lou Kcpwz 27:26 ☆ **3:11** Habakuk 2:4; Rom 1:17; Hibru 10:38 * **3:11** 3:9 Krlcde seleng—nztubqngr mz nzobqkr Gct, x nzlu-alongr mrkc Heven. 3:10 Kxmule-esz' aleq alwx esz'txu, xpqbrlr-ngrn Louxtr, x amncclzbzle nim mz nzayrplapxkr Gct. 3:11 Natq Gct lc drtwr ngrde li. Leplz neng Gct sa namnc-zpwxng mz nrlc ka mzli kx nzlu-krdr vz-nqblq-ngrde nzbrtikr drtwrdr nide. X nzlungr kxboi Heven vzpxm mz nzabrtr-krbzlr drtwrdr mz Jiszs. ☆ **3:12** Livae 18:5 ☆ **3:13** Lou Kcpwz 21:23

nigu, murde natwzku Mqngrkxtr kc tqesalz-ngrbz Gct mz krkcng tzlxngitilr da kx esalz-ngrdeng.

Lou Sc Mosis Trayrkrpxleu Da Kc Tqesalz-kaingr Gct

¹⁵ Mzlengeng x inwengeng, napibo dq nzymne-ebzpxngr. Mzli kx kzdq ncblo yro-ngrde drtq doa kx natwzle drtc' nyzde x dztudeng mz nibr nzbz-krde, trpnzngr kx krlzle nztekqtr-krde nike yrole. Mz nqm q lcpwz, trpnzngr kx krlzle nzrtekqtrngr da kx esalz-ngrbz Gct mz Ebraam.

¹⁶ Gct esalz-ngrbzle da lc mz Ebraam x mz doa nede. Tresalz-ngrpwzleu mz doa nedeng, kcng tzngi lr Israel. A' mz Nzryrngkxtr rpibz Gct mz Ebraam kx, "*Mz doa nem.*" Ycmnetile doa esz'txu, kc tqngi Jiszs Kxnmcpix. ✧

¹⁷ Gct esalz-kai-ngrbzle da mz Ebraam, x mz nibr yiz trtqki-pwx-nzpnu-tq (430) sc tqka-atebzle Lou kc mz Mosis, nangi scdr lr Israel. Mz nzmu-krde lcde, rblx nzkapx-krde Nzesz'tikr Drtwr Gct ncdr Ebraam x Kraes, doa nede. Nzesalz-krde krali tratrkatileu krkc kai.

¹⁸ Ka-nrbalq Gct da kxmrlzting amrlx kcng tqesalz-ngrbzle mz Ebraam x Kraes. X natwz-kzku da lcng, mz nzaxvctr-krbzku mz Kraes. A' nzmu navz-nqblqku Lou sc Gct mz nzrtwzng da lcng, e trngipeu da kx nzka-nrbalq. A' Gct ka-nrbalq-zpwxbzle da lcng mz Ebraam, da kc tqwai nzesalz-krdele.

✧ **3:16** Nou 12:7; 13:15; 24:7

19 ?E mz nibrde, nike Gct tqka-ngrbzle Loukxtr mz Mosis, nangi sc lr Israel? Gct pibzle mz enjrl nedeng, nakabzlr Lou badr. Suti drtwrde nzaelwapx-krde kxnamu nzmnc-zpwx-krdr badr kxmule-esz' nzaleng alwx, nakrlzbzle mzli kc navz-ngrm Kraes. †

20 Loukxtr ngi Nzesz'tikr Drtwr Gct badr leplz nedeng. Mosis nide kc tqtu mz mzli Gct x leplz nedeng. X leplz mz nrlarde lcng li natutrlr natqdr, murde kzdung da kc tqesalz-ngrbz Gct badr mz Nzesz'tikr Drtwrdr lc, nztuong mz nzvz-nqblq-krdr natqde. Dekc, da kxmrlzting kcng tzvzpxmqng mz Lou, tzyctrng mz kxnamu nzalelr me pnz drtwrde. A' da kc tqesalz-ngrbz Gct mz Ebraam, yctxtrpwz mz Gct esz'-krde nzale-krde da kc tqesalz-ngrbzle bade. A' tryctrpwzu mz nike na-ale Ebraam.

21 ?Lou kcng tqka Gct, nzrpwa'-ngrbzlr bade nzatutr-krde da kx esalz-ngrbzle? Trtingr! Murde rblxbz mz lou nzatubqtingr kxnzaleng alwx. X trpnzngr lou kx kabzle nzlungr kxboi.

22 Murde Nzryrngrkxtr amnczbzle leplz amrlx mz zmatq ngrde vzpxm mz nztao-krdr mz alwx. X trpnzngr leplz kx krlzle nzarlapx-lzbq-krde. takitrde nzrtwzngr nzlungr kxboi mz da kx alele. A' esalz-ngrbz Gct nzlungr kxboi mz doa amrlx kx nzabrtrpzlr drtwrdr mz Jiszs Kxnmcpix nzarlapx-krde nidr.

23 X mzli kc trlxngitikakr Kraes, nigr lr Jiu mnclzbzkr mz mz nzapu-krgr kxnmncng mz

† 3:19 Mz nzvz-krmlc, Kraes sc tqtwzpele da kc tqesalz-ngrbz Gct bade nidr mz Ebraam. X leplz amrlx kcng tzaxvctrpzng mz Kraes nztwz-nrbalq-kzlr da lcng.

presin. Murde mzli kc navzm Kraes naoliqtikr nzlXngiti-krgr nide.

²⁴ X Loukxtr apule kxakrlz. Murde kam Gct Loukxtr bagr, mz nzmailz-krbzle nigr mz Kraes, murde natubqkr mz nzobqkr God mz nzbtrtkr drtwrgr nide. ‡

²⁵ A' mzli ka, mz nzlXngiti-krgr Kraes, trmn-clzpepwzkru mz zmatq ngr Lou sc Mosis.

KxnzrlXngiting Nzapulr Doa Kxnztopwzng Ne Gct, Mz Nzaxvctr-krbzlr Mz Mrlxde

²⁶ Mzli ka kxmule-esz' trnginipuu lr Jiu, a' nimu kz doa kxnztopwzng ne Gct, murde lxngitiamu Mevalu Jiszs nzarlapx-krde nimu.

²⁷ Nzaxvctrpebzmu mz Kraes, mzli kc tqrlXngiti-ngrnamu x tqwrkxtr-ngrnamu. X mzli ka mz nzaxvctr-krbzmu lc bade, sa tqapupeamu nide mz nqmQ krdeng amrlx.

²⁸ Trpnzngr doa kx myaszlzle kztedeng mz drtwr Gct kxmule-esz' nide lr Jiu o kxtrngiulrJiu, nide kxnzawz-nrbalq o ncblo kxetu, x kx ngi ncblo o olvz, murde nigu amrlx ngrgu nzprtrku mz dzbede kxes' mz nzlXngiti-krgr Kraes.

²⁹ X mz nzesz'ti-krgru mz Kraes, twzku da kcng tqmrlzting, tqesalz-ngrbz Gct mz Ebraam, x mz Kraes, doa lc tqvzpxm mz nqvi lrde.

4

Nzmnclz-ngrbz Mz Lou Apule Nznginingr Kxnzawz-nrbalq

‡ **3:24** Loukxtr aelwax-ngrmle bagu alwx ngrgung. X sa na-ayrplapx Gct kxnzaleng alwx mz Hxl. Dekc tqsutu drtwrgu Mevalu kx na-arlapxle nigu.

1-2 Mzli kc nigr lr Jiu tqmncly-ngrbzkr mz Lou sc Mosis, apukr doa kxntopwzng. Kxmule-esz' dztu trte sa nangi dztu doa kxtopwz nede kalr, a' mzli la tqnginibe-ngrde doa kxtopwz, apule kxnzawz-nrbalq. Trpnzngr scde zmatq kx na-acle-lzbq-ngrde. A' navz-nqblqle natq trtede badr kxnzaclvelr nide, nakrlzbzle mzli kc tqpnz drtwr trtede nzka-krbzle kzdung da bade, kx nzetupe-krde.

3 Kxmu-kzpwzle la mz nigr lr Jiu. Mzli lc tqapu-ngrgr doa kxnztopwzlyzbzng mz nzmailzkr Loukxtr. X apu-kzkr kxnzawz-nrbalqng murde yrplatixtrpwz nargr kx navz-nqblqkr lou lcong amrlx.

4 A' kx krlzbzle mzli kc tqyrlq Gct, atwzlr-ngrmle mrlxde, mzte nzmc nzngini-krde ncblo txne, kx ngi lr Jiu, kc tqmnclybz mz Loukxtr.

5 Vzm mz nzarlax-krde nigr lr Jiu, murde nangingr doa neng Gct, kcng natwzkr da amrlx kx rngisc Kraes, mz nzaxvctr-krbzkr bade.

6 X mzli ka nipe-kzmu doa neng Gct. X Mqngr Mrlxde kc tqmncpxm mz nabzgu, okatrle nigu nzkrly-krqu kx takitrde doa kxes' mz nigu nzrpi-krde kx, 'Gct ngi Trtenge!'

7 Dekc trnipeguu kxnzawz-nrbalqng, a' nipeguu doa neng Gct kcng natwzlr da kxmrlzting amrlx tqesalz-ngrbzle bagu.

Doa Kx Brti Drtwrde Nzrvz-nqblqngr Nqmq Kr Lepz Mz Nzrlapxng, Sa Navz Mz Hxl

8 Mzli kc nimu kxtrngiulrJiu trkrlzwamuu Gct angidr kc esz'txu, murde trxlrkalamu Nrpakxm-

rlz. Mzli lcde mnclzbzmu mz zmatq ngr drka' mz nzungio-krmu nidr x nzwztr-krbzmu badr.

⁹ A' mzli ka, krlzpeamu Gct, x rpile kx nimu doa nedeng. ?Memule tqyzlu-mou-ngrnamu mz nzwztr-krbzmu mz drka' lcdeng tzatrkatng, kx trpnzng r scdr zmatq mz nzarlax-krdr nimu?

¹⁰ Prtrpzmu mz nqmq kr lr Jiu, x mz nzakaputr-krmamu zbq, temz, yiz, x nrpr kxtr nyzdrng.

¹¹ A' mwxlrlvzx nimu mz nzpxtpx-krmu Kxnmcp, murde nzwz-krngeng amrlx trpengr da kx nabxtrlr.

^{12a} Yrnitirpo bamu. Vz-nqblqamu nqmq nr drtwrnge mzli ka mz nzalvztr-krnge lc, murde mz nivz kxetu, sc tqvz-nqblqpex nqmq krmu mzli kc tqmnc-ngrgu. A' trvz-nqblqwxu nqmq krgng.

Pol Ycmnetr-ngrde Nivz Lrde X Nzotrkr Drtwrde Lr Galesia

^{12b} Mzlngeng x inwengeng, trpnzng r da kx-trka kx alemamu bange mzli kc.

¹³ A' krlzamu kx mzli kc ayrnrngr tqryapwxpx-ngrbo Nrpakxmrlz bamu, yangrngatipex nzvzng.

¹⁴ Kxmule-esz' wz-zlwzamu mz nzaclve-krmu ninge, a' trbqszou drtwrmu ninge. A' suti drtwrmu namncku, mz nzapusr-krnamu ninge enjrl kx avzom Gct, o Mevalu Jiszsz esz'-krde.

¹⁵ Abrtzlvzamu ninge mzli lc tqryapwxpx-ngrbo Nrpakxmrlz. ? Memule tqblepxpe-ngrnamu mzli ka? Murde vqti drtqmu nzokatr-krmu ninge mzli lc.

16 ?A' mzli ka, nike tqapusr-ngnamu ninge enqmi rmu? ?Murde pi-mopo bamu lrpzki angidr ngr nzrlapxngr?

17 Leplz kcng tzsuti drtwrdr nzvz-nqblq-krmu Lou sc Mosis, nztamiti-zlwzlr nimu mz nzprtr-krbzmu mz nqm q krdr. A' trngiu dalr nzoka-trngr nimu. A' nakapxmlr nimu bagr, murde namnclzbzmu badr.

18 Nangi da kxbrngz nzsutikr drtwrdr nzngini-krmu kxnzvw-nqblqlr nidr, nzmu nzalvztr-ngrbzlr bamu da angidr. Murde mrlz nzvz-nqblq-krmu da angidr, a' bzkq ngi txpwz mzli kx mnc-ngrbo bamu.

19 Doa nengeng, apux lxemu, murde drtwrnge yckq krlzbzle mzli kx mzpu nzmc-ngrr, x opx angidr kx nzmnc-krmu lc mrlz, x navz-nqblq-zpwxamu Kraes mz nzapu-krmu nide.

20 Rblxm bange nzkrlzngz nike nayrx mz nzlxngiti-krmule. X sutitx drtwrnge kx namnc-tpwzku elx mrla mzli ka, murde naycmne-nrxbo bamu.

Gct Sa Napxtpx-ngrde Leplz Kcng Tzmn-clzbzng Mz Lou Sc Mosis

21 Nimu lr Galesia kcng tzsuti drtwrdr nzl-apxngz mz nzmncz-krbzmu mz Lou sc Mosis, trkrlzwamuu nike tqalvztr Lou lang.

22 Murde nzyr elr kx Ebraam mrlxde nzling. Kc ayrrngr drtqde Ismael, yrlopxbz Haga, olvz kxnzawz-nrbalq ne olvz rde, Sera. Krali drtqde Aesak, yrlopxbz Sera, olvz ngr Ebraam, kx trngiu kxnzawz-nrbalq, a' drtqde opx.

²³ Gct esalz-ngrbzle mz Ebraam kx nede dq doa ncblo. Zbz mrlx Haga mzte nzmc, murde Ebraam rpile na-angidale natq lc mz nide esz'-krde. A' mrlx Sera mzte nzmc, murde Gct esz'-krde atutrlle natqde mz nzrmcngr mz Aesak.

²⁴⁻²⁵ X olvz lcng nzling ngi kz kzdq nzymne-ebzpxngr, murde nztu-ngrdr Nzesz'tikr Drtwr kcng li kx blepx-lxblrngr mz mzlr Gct x leplz nedeng. Haga tu-ngrde Nzesz'tikr Drtwr Kc Kai, tqkabz Gct mz Mosis, mz Newz Saenae mrkc Arabia. X tu-kz-ngrde Jerusalem mz nrlc ka, murde leplz ngrdeng nznginipedr kxanzawz-nrbalqng kcng tzmncclzbzng mz zmatq ngr Lou.
✧

²⁶ A' Sera tu-ngrde Nzesz'tikr Drtwr Gct Kc Ate badr leplz kcng tzlxngitilr Kraes. Nzesz'tikr Drtwr lc ngi dalr zmrlz ngrde kxmyalz x da kx esalz-ngrde mz nzavzo-krmle Kraes. Sera tu-kz-ngrde Jerusalem kc navzm, mrkc namncngr leplz neng Kraes amrlx kalr. X ni-kzgu doa neng Sera kcng drtqdr tqopx, x prtrpzku mz nqvi lr Gct, murde brtipe drtwrgu da kx esalz-ngrde.

²⁷ X profet Asaea ycmnetr-ngrde Sera mz nzrpi-krde kx, *“Olvz kx vz-nrbalq, nim kc trpnzngr nede doa, drtwrm naelalm! Kabopx mz nzabrtz-krm, nim kc drtqde tretqu mz nzrmcngr mz doa! Murde nim kc tr-rngine-pnzuz doa mzli kc, sa narnginetim doa kxkqlu namyaszpxle olvz kc tzmncng mz*

✧ **4:24-25** Sam 110; Asaea 9:6

ncblo ngrde." ☆ *

²⁸ Mzlangeng x inwengeng, apuku Aesak, mrlx Sera, murde prtrku mz nztubqngr kc tqvzpxm mz da kx esalzng Gct.

²⁹ Mzli lc pnz Ismael atrkatile Aesak, kc tq-batrpz Mqngrkxtr mzte nzrmcng. X mzli ka krkcng tzmnczbzng mz Lou sc Mosis, nzatrkatikzlr nigu kcng tlxngitilr Kraes mz nzokatrkr Mqngrkxtr.

³⁰ A' mcku mz Nzryrngrkxtr, kx Sera pibzle mz Ebraam kx, "*Maszlrpxngr Haga ncdr mrlxde. Murde trpnzng nprtrkr mrlx olvz kxnzawz-nrbalq lc mz da lcng nakaobz mz mrlx*" olvz kx drtqde opx. †

³¹ Mz drtwr lc, nadcpz mz drtwrmu kx trnginiguu doa neng Haga, olvz lc tzawz-nrbalq. A' nigu doa neng Sera, olvz lc drtqde opx, murde Kraes arlapxpele nigu.

5

Bzkq Lxngitiamu Leplz Kcng Tzsuti Drtwrdr Kx Namnczbzmu Mz Lou Mz Nzrlapxng

¹ Kraes arlapxle nigu murde drtqgu naopx. X trsutiu drtwrde nzmncz-mou-krbzmu mz Lou sc

☆ **4:27** Asaea 54:1 * **4:27** 4:23 Mzli lc pnz, Sera vz-nrbalq. X Ebraam trngtibzle Haga, kc tqmikapele Ismael. Mz nibrde Gct batrpzle Sera nzmika-krde Aesak. 4:27 Pol mcle kx nzqqlukr leplz kxtrngiulrjiu kx nalxngitilr jiszs kalr, sa namyaszpxlr lr Jiu kcng tzvz-nqblqlr Loukxtr. † **4:30** [Nou 21:10] X Gct pibzle mz Ebraam kx navz-nqblqlle natq Sera. Mz nzmu-krde lcde, leplz kcng tzmnczbzng mz Lou trpnzng nidr nzrlapx-krdr, da kc tzwaibz mz Ismael, murde trpnzng da sc Ebraam kc tqtwzle.

Mosis. A' natu-amqngiamu mz nzarlapxkr Kraes nimu.

² Murde ninge, Pol, pibo bamu kx nzmu nimu kxtrngiulrJiu rlr-lzbq-ngrbzmz mz nzrpakrngr nzrlapxngr nimu, e nzbzkr Kraes mz kros trpnzngr nzarlapx-krde nimu.

³ Aclvetio-angidramu! Murde ncblo kx natubqbz mz nzobqkr Gct mz nzrlr-lzbq-ngrbz mz nzrpakrngr, navz-nqblq-kzle Lou sc Mosis amrlx x bzkq tao mz alwx.

⁴ Kxnvzv-nqblqlr Lou mz nzatubqtingr nidr nzpxtpxpe-ngrdr zmrlz ngr Gct kxmyalz. X sc tzlakitpxpebngr mz nqvi lr Kraes.

⁵ A' mz nzokatrkr Mqngrkxtr, sc tqobqtixku da amrlx kx esalz-ngrbz Gct bagu mz nzatubqtikr Kraes nigu kcng tzbrtipe drtwrgu nide.

⁶ Murde mz nzaxvctr-krbzku mz Mevalu Jiszs, trpnzngr da kx ablepxle nzmu napakrgu o trt-ingr. A' da kx myapxbz ngi nzrlxngitingr nide, x nzrvz-nqblqngr nide mz nzmrlzti-krdu leplz.

⁷ Ir Galesia vz-nqblq-angidramu Kraes mzli kc. ?Neke aesakibzle nzvz-nqblq-krmu lrpzki angidr ngr nzarlapxngr?

⁸ Nzrtamitingr la, trvzpxpuu mz Gct kc tqaveatile nimu mz nzngini-krmu doa nedeng.

⁹ Nzalvztrngr kxtrka kxpipzne krlzle nzatrkatikrde nzrlxngitikr leplz ne Gct amrlx, da kc tqwai yisti kxpipzne nztalvzpx-krde flawa kx nangi bret, mz nzawzpx-krdele.

¹⁰ A' lxngitix kx Kxetu rgu sa naokatrle nimu murde navz-nqblqamu Nrpakxmrlz kc tqalvztrpo bamu mzli kc. A' Gct sa na-ayrplapxle

mrlx kc tqakamrbr-ngrbzle drtwrmu, mz nza-lvztrngr lc tqtrka, kxmule-esz' nide neke.

¹¹ ?Mzlangeng x inwengeng, nzmu sa tqalvztr-pex kx ncblo napakr, nike drtwrdr tqngya-ngrmle bange? Nzpxtpx-ngrdr nzalvztr-krnge kx nzbzkr Kraes mz kros txpwz kx arlapxle nigu, murde rblx nzglqpx-lzbq-krdr mz da lc.

¹² A' sutitx zlwz drtwrnge kx krkcng tza-trkatilr nimu mz rtulrtr-ngrbzlr bamu nzipakrngr, navzpx-lzbq-kzng.

Navz-nqblqku Nzycmne-krm Mqngrkxtr Mz Nabzgu

¹³ Mzlangeng x inwengeng, Gct aopxle drtqmu murde naokatramu kztemung mz nivz. A' mz nzprtr-krmu mz nzaopxkr drtqmu lc, bzkq vz-nqblqamu nepunr drtwrmu kx ataole nimu mz alwx kc tq atrkatile leplz.

¹⁴ Murde sa tqangidapeamu Lou kc atwrnrngr mz nzvz-nqblq-krmu natq kc tqrpilē kx, “*Mrlzti kztemqng da kc tqwaiq nzmrlzti-lzbq-krm.*” ✧

¹⁵ A' bzkq atrkatiamu nzmncr-lxblrkr leplz ne Gct, mz nzngya-etrkr drtwrmu x nzotabl-etrknamu.

¹⁶ A' vz-nqblqamu nzycmnekr Mqngrkxtr mz nabzmu, murde mz nzale-krmu da lc, trnavz-nqblqamuu nepunr drtwr lcng tqtrka.

¹⁷ Nepunr drtwrmu x Mqngrkxtr nzota-etrng x nzota-ebirtr-zvzpxmqng bamu, mz nzaprcti-krdr nimu.

¹⁸ A' vz-nqblqamu Mqngrkxtr, murde mz nzale-krmu da lc, trmnczpepwzmuu mz Lou sc Mosis.

✧ **5:14** Livae 19:18; Matiu 19:19; 22:39; Mak 12:31; Luk 10:27; Rom 13:9; Jemes 2:8

19 Nepunr drtwrdr kxdrka'ngr mailzle leplz mz
nzale-krdr da kxnmulr lcde seng.

Nzrmwimingr leplz kx trngiu krnalzdr,
trnzlqngi-kru drtwrdr,
nzamqmiti-rbr-krdr mz nrkrdrdqdr,

20 nzangio-krdr da kx trngiu Gct angidr,
nzryzplengz-krdr leplz,

drtwrdr kxmwa,
trnzmnc-nivzlr-krdr,
nzdobukr drtwrdr,
nzypupxkr zngya,
nztalwz-krdr,
nzrpwa'-zvz-krdr da,
nzaki-lzbq-krdr,

21 nzrkcmnz-krdr,
nzrmnq-zvz-krdr, x
trnzclu-krdr mz da kx myangr drtq.
x da kxnmulr lcng.

Kabo bamu natq kx xplr mzli ka, da kc tqwaile
mzli kc, kx leplz kx nzale-zvzng da lcng tr-
natwzlru da kcng nzvzpxmqng mz Gct, murde
nzpxtpx-ngrdr nzngini-krde King rdr.

22-23 A' nra Mqngrkxtr mz nabz leplz kcng tzvz-
nqblqlr nide, nidr seleng:

nivz,
nzalalz-krm drtwr,
nzmnczpxwng,
nzaenzli-zpwxng,
nzokatrng,
nzrmrlzng,
nzatukztrng natq,
nzvz-nrwxng, x
nzaclve-lzbqng.

X Lou sc Mosis tr-rpwa'-ngrdeu nzale-krmu da lcnq.

²⁴ A' doa neng Mevalu Jiszs nzrtxo-amqngilr nepunr nabzdr kxdrka'ngr. X opxm kx nztqlvztrlrng mz kros.

²⁵ X namnc-nqblq-zvzku natq Mqngrkxtr mz nabzgu, murde nide kc tqalu-mople nigu.

²⁶ A' bzkq glqpx-lzbqku, murde batr-ngrbzku nzngyatikr drtwr leplz nigu x nzdobuti-krdr nigu.

6

Naokatrku Kztegung

¹ Mzlangeng x inwengeng, mzli kx kzdq nimu tao-ngrde mz alwx, nimu kcng tzbrng mz nzmnc-nqblq-krmu Mqngrkxtr, naokatramu nide mz nzyzlu-krmle mz Gct. A' mz nzalengr da lc, na-avzo-lzbqamu x navz-nrwxngr, murde ma tqtaoamu mz alwx kcpwz.

² X naokatr-kzamu leplz kx prtilz da kxtrka. Murde sa tqangidapeamu natq Kraes kc tqrpile kx namrlzti-lzbqku.

³ A' doa kc tqrpile kx nide ncblo kxmyalz, a' trngiu da angidr, ncblo la angqnguti-lzbq, x tao mz alwx ngr nzglqpx-lzbqngr.

⁴ Mz drtwr lc, pwxlitipxpwz kx da kc tqaleq brngz o trka, murde na-abrtzlvzq nzale-krm da kxtubq. A' bzkq arsaklr-lzbq-ngrnamu ncdr kztem.

⁵ Murde doa kxes' na-alele nzwzngr kx amn-qlzbz Gct bade.

⁶ X takitrde kx nimu kcng tzalvztr mz natq Gct naokatramu ncblo kc tqalvztrle nimu, mz nzrkakrbzmu da x trau bade.

Sa Namcku Nra Nzmnc-krqu Kalr

⁷ Bzkg apokiati-lzbqamu. Murde Gct tr-rlrpxngrdeu leplz nzxtrnga-krdr nide. A' ayzlu-mopwzle da mz leplz amrlx mz nzvz-nqblq-krde da kx nzpetilr mz nzmnc-krdr mz nrlc ka. Da kc tqwai nzrtwz-krmu mz nrlanc nyzmu da kx petiamu elr.

⁸ Doa kc tqvz-nqblq-zvzle nepunr drtwrde kxdrka'ngr, sa natwzle nzodati-alongr mz Hxl. A' doa kc tqvz-nqblq-zvzle Mqngkrxtr, sa natwzle nzlungr kxboi Heven.

⁹ Bzkg drtqmu sa mz nzalengr da kxmrlz, kxmule-esz' trmckalamu da kx vzpxm elr. Murde sa namcku nra nzwz-krkung kalr.

¹⁰ Mz nzmu-krde lcde, naokatrku leplz amrlx mzli kx takitrde, myapxbz kztegunq kcng tzrlxn-giting.

Natq Ngr Nzarlr-lzbqngr

¹¹ Mcamu ena nzryr-krnge lcng tqwzpx! Ryrbo bamu mz mqnge, murde naglxamu kx ninge angidr lc tqryrbo bamu. *

¹² Leplz kcng tzrpilr kx napakrmu, nzmwxlrng nzplzpx-krdr Nrpakxmrlz kx nzbzkr Kraes mz kros arlapxle nigu. Murde nzaoti drtwrdr lr Jiu lcng, murde ma tzatrkatilr nidr.

* **6:11** Letz lc mzli kc tzyr-ngrde, yr kzdq ncblo x Pol kc tqycmnepwz. Mzli kc tqkrlz-ngrmle ngalde 11, sc tqyrpe Pol.

¹³ A' krkcng tzipakrng trnzlolvz-pnzlru Lou scng Gct amrlx. A' nzsuti drtwrdr nzglqpx-lzbq-ngrbz mz lr Jiu kcng, mz nzvecp-xkrdr nimu mz nzipakrng.

¹⁴ Trtakitrdeu nzglqpx-lzbq-krnge, a' ngi txpwz mz nzbzkr Kxetu rgu Jiszs Kxnmcp-x mz kros mz nzarlax-krde ninge. Murde prtr-x mz nzbz-krde lc. X mzli ka dalr nrlc ka trpengr nztamiti-krdr ninge, x nar leplz mz nrlc ka tryrplatitrlru nqm-q ngr drtwrge.

¹⁵ Nzipakrng o trnzpakr-ngru trmyapxp-wz. A' da kx myatxp-wz ye, nzk-a-krbz Gct nzlu-krde bamu mz nzyrlqtr-krbzle Mqngk-xtr mz nabzmu.

¹⁶ Gct sa nalc mz drtwrde leplz amrlx kcng tzvz-nqblqr nzalvztr-krnge lcng, mz nzk-a-krbzle nzmnc-zpw-x-krdr badr. Murde mz nngini-krdr leplz neng Gct, nidr lr Israel angidr.

¹⁷ Abzo mzli ka, bzq rpiamu kx nzalvztr-krnge vz-rbr. Murde op-x angidr kx wztr-zpw-xbo mz Kxetu Jiszs, murde nrkrdr-tqng-e tulvzpe bzmr nzk-va-brkr leplz ninge x nzr-ik-la-krdr ninge.

¹⁸ Mzle-ng-e x inweng-e, krka'-ngrne kx Kxetu rgu Jiszs Kxnmcp-x, nakabzle bamu zmrlz ngrde kxmyalz mz nabzmu. Eu, angida.

Delape. Ninge *Pol*.

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f